

船
山
師
友
記

敘

敘曰周衰七十子之徒既歿道術壞散戰國之際縱橫怪迂之變益紛然淆亂莫可統一漢興表章六藝儒生朋興掇拾大誼越千季而有宋鉅儒出益究其說道寢彰顯矣其後頗復裔亂寢失其真元明呂降代承其弊 國家肇基黃氏顧氏之倫迺倡言復古綜攬百代廓絕流宄厥風大醅然其所明典章文獻制作道法之迹而已而大道之要微言之統未暇明也于時衡陽船山王先生竝世遺老抗其孤篋卓犖之心上契聖典旁包百氏蒙者發之滯者通之天人之蘊教化之紀次第昭列自孟荀朱子呂來道術之備於斯爲盛顧其書久而後顯越二百有

餘歲鄉人郭侍郎嵩燾始尊信而篤好之曰爲斯文之傳莫大乎是而吾友湘潭羅君正鈞亦承郭侍郎之風勤一世以盡心於先生之書者也始補輯年譜若干卷今復輯先生交游終始所關爲師友記凡十有七卷維夫師儒之守炳於周代莊荀韓非呂覽於老墨之徒類載其傳述淵源使可識別史遷仲尼弟子列傳益復燦然漢世經生尤重師法儒林傳授所出咸具首尾厥後羣輔錄別傳淵源錄學案之等派別滋繇不可殫記是記所託略依其義而頗相出入其用力之勤有過人者獨以謂先生亡國羈孤窮荒晦昧與世睽絕然是記所攷列尙百五十有七人孔子曰德不孤必有鄰益曰推知鳥獸不可同羣之

誼昭著明白自天地剖判已來遭極窮變亦無能絕類離倫孤
成其學自放於人紀之表而士生季晚發憤幽隱私淑其人不可
復見於是語言之所及杖履之所接皆若震動恪恭愾慕流
連莫能自止蓋攷其德而知其世網羅前聞懷其舊俗賢人君子
進退離合流風餘思有在於是者詩曰我思古人俾無訛兮
太史遷曰坳驥尾而名益彰非坳青雲之士惡能聲施後世是
羅君爲書之志也光緒戊子六月陳三立敘

亡友王君豫書

大箸敬讀畢蒐采之博攷訂之詳俱臻絕等輩諸公本因船山而益光得此編而船山平生亦藉以攷見匪獨有造於諸公也末卷敘贊簡奧古味盎然則尤啟原所心醉願爲而不能者撰箸若此可謂盛矣間以管見簽識數語未審當否唯哂削之同里王啟原白

船山師友記目錄

湘潭羅正鈞纂

首卷

武夷先生

牧石先生

貞獻先生

涇齋先生

第一卷

王僉事志堅

水侍御佳允

王中丞永祚

高提學世泰

蔡比部鳳

歐陽黃門霖

郭給諫之祥

孫侍郎承澤

弟二卷

蔡忠烈道憲

章文毅曠

鄭中丞古愛

李大令興瓌

堵太傅允錫

晏尙書清

子霽明

第三卷

瞿忠宣式耜

嚴太傅起恆

金黃門堡

劉僉都湘客

蒙給諫正發

管舍人嗣裘

董行人雲驥

弟四卷

方閣老以智

郭少馬都賢

張宮詹同儻

朱侍御嗣敏

李小司馬芳先

彭小司馬焱

姚秀才湘

唐相國誠

錢編修秉鐙

熊閣學開元

尹郎中民興

第五卷

伍先生學父

譚處士允阜

弟允都

允琳

歐陽翁正暘

梁大令志仁

鄭尙書逢元

劉水部明遇

金觀察九陞

第六卷

夏孝廉汝弼

弟汝爲

文明經之勇

歐陽文學惺

郭孝廉鳳聽

李孝廉跨菴

何孝廉一琦

包孝廉世美

熊渭公秉

李雲田以馱

王又沂源曾

朱靜源

熊南吉

劉行人自煜

第七卷

朱王孫禪黎

李徵君繼體

洪文學業嘉

龍孝廉孔蒸

歐陽太僕鎮

子淑

蕭一夔常廣

阮參軍志道

曹明經國光

第八卷

劉孝廉惟贊

鄒舍人統魯

左素公

羅文學從義

羅明經英

甯孝廉朝柱

王山人文儼

殷廣文銘

第九卷

王愷六

李孝廉國相

管文學嗣箕

唐處士克峻

劉孝廉象賢

劉文學近魯

兄璋

朱王孫翠濤

李文學報瓊

熊男公

熊畏齋

第十卷

周孝廉士儀

李廣文燦

劉孝尼

黃將軍金臺

劉平思

張都督國祚

徐廣文芳

董副將啟行

季簡尤

何詣得

第十一卷

陳孝廉觀

陳廣文五鼎

龍孝廉孔然

李孝廉占解

劉孝廉培泰

黃度長

蔣九英

劉救功

歐陽喜翁翦

龍龍衣襲

李明經遇唐

程奕先光祿

程大匡

第十二卷

歐明經大生

李大令何焯

余兼尊

徐令素

羅桐侯

李進士樸大

王文學祚隆

劉處士獻廷

曾處士致文

曾陵如萬年

第十三卷

管永敘

羅仲宣瑄

章載謀有謨

唐如心克恕

唐古遺端典

唐須竹端笏

戴文學日煥

蕭文學子石

王灝

蒙之鴻

曾廣文岳

曾學博萬芳

劉永治

劉存孺

弟十四卷

鄭忝生興祖

李治尹嚮明

劉輯夏法忠

熊體貞時幹

王幼重敏

王騰原敞

王曷功敞

王虎止敵

第十五卷

釋茹蘗智需

釋凝然性翰

釋悟一

釋慈枝

釋破門法智

釋如滿

釋先開

釋二如表

釋萬峰知韜

釋楚雲

釋惟印

第十六卷

顧處士炎武

陸清獻隴其

施行唐

王鴻博岱

鄭中丞端

崔鳴鶯

張明府芳

第十七卷

敘贊

船山師友記首卷

湘潭羅正鈞纂

武夷先生

王朝聘字修侯衡陽人性篤孝父喪竭哀盡禮知府李燾嘉其
行爲表其父塋以旌之旣終喪授徒衡山母忽遘疾朝聘聞報
薄暮馳百里漏二下抵家母一顧而終奉母咯痰孟哭三日夜
不絕每父母忌日輒孺子泣年七十不少衰生平學務克己斂
華就實不爲苟難天啟辛酉以副貢遊北雍崇禎中當得官會
溫體仁當國選郎承意旨索賂朝聘曰仕以榮親而賂以取辱
可乎遂碎牒歸有司聞風造請皆以疾辭不見晚臥病南嶽遊

花峯臨終戒其子介之夫之葬峯下題曰明處士之墓

湖南通志人物

傳

家世節錄云壬午冬夫之上計偕請於先君曰夫之此行也將晉贄於今君子之門受詔志之教不知得否先君怫然曰今所謂君子者吾固不敢知也要行已有本末以人爲本而已末之必將以身殉他人之道何似以身殉己之道哉慎之一入而不可止他日雖欲殉己而無可殉矣嗚呼先君之訓如日在天使夫之能率若不忘庚寅之役當不致與匪人力爭拂衣以遞或得披草凌危以頸血效嵇侍中濺御衣何至栖遲歧路至於今日求一片乾淨土以死而不得哉 又

云先君教兩兄及夫之以方嚴聞於族黨顧當所敢迪恆以
溫顏獎掖或置棋枰令對弈焉唯不許令習博築擊毬游俠
劣伎閒坐則舉先正語錄辯析開曉及本朝沿革史傳所遺
略與前輩風軌下及制藝剔銓長談中夜不休兩兄潛至無
大過失夫之少不自簡多口過每至發露先君不急加詰謫
唯正色不與語問亦不答故夫之兄弟亦不易自請誓焉如
此旬餘必待真恥內動流涕求改而後譴訶得施己乃釋然
至於終世未嘗再舉前過以相戒庭兒之閒暄日嚴霜竝行
不悖恆謂處人己之閒當令有餘親如子弟賤如奴僕且不
可一往求盡況其他乎其施於家者張弛如此而夫之兄弟

亦幸以免於惡焉

武夷先生行狀

黃齋逸文

云先君少從鄉大儒伍學父先生定相

受業中問道鄒泗山先生承東廓之傳以真知實踐爲學當
羅李之徒紛紜樹幟獨弢光退處不立畦畝衣冠時制言動
和易自提誠意爲省察密用則不孝兄弟自有識以來日炙
而莫窺其際者也所學於學父先生者天人理數財賦兵戎
罔不貫洽而未嘗一語及之曾聞與釋憨山德清辨率性之
旨清爲挫屈夫之舉以請問微哂不答凡洗心退藏不欲暴
著類如此 又云夫之稍與人士交遊以雕蟲問世每蒙
訶責謂躬行不逮而亟於尙口孺子其窮乎嗚呼奉若不恪

既不能自立不朽而家學載之空言者且將無託吾父之言
炯若神明一至此乎

春秋家說自序

薑齋文集

云先徵君武夷府君早受春秋於西陽

楊氏進業於安成劉氏已乃研心曠目歷年有得惜無傳人
夫之夙賦鈍怠欲請而不敢歲在丙戌大運傾覆府君於時
春秋七十有七悲天閔道誓將謝世乃呼夫之而命之夫之
受命怵惕發蒙執經而進敘問其所未知府君更端博說浚
其已淺疏其過淺折其同三傳之未廣詰其異三傳之未安
始於元年統天之非終於獲麟瑞應之誕明以詳者不復伸
略以晦者弗有詘也幾於備矣

六十自定彙己酉年有家兄觀夫之鈔彙云墨迹似先徵君

垂示以詩哀定敬和四韻一首

五律

正鈞按辛酉爲天啟元年先生以萬曆四十七年己未生
武夷先生應貢入北雍先生年甫三歲家世節錄云已赴
部謁選會烏程當國苛按辛酉副貢移儀曹索故紙束溼
甚暗索賄焉先君碎假牒而退遂歸家居十七載不一至
郡邑庭證以譚太孺人行狀先君子十年燕趙之語則辛
酉至辛未爲十年而武夷沒於丁亥上溯辛未首尾亦正
十有七年蓋先生之身沐庭訓者深矣先生於家學自述
最詳茲就顯著者摘錄一二以見淵源之自焉

牧石先生

王廷聘字蔚仲號牧石衡陽諸生而農先生叔父也有詩數百

首均佚

沅湘耆舊
集小傳

家世節錄云仲父牧石先生和易而介恬於榮利博識工行
艸書古詩得建安風骨近體遍何李而上深不喜竟陵體詩
每輦臧曰何爲作此兒女嚙呢晚歲築室垆外號曳塗居蒔
花植藥怡然忘物每謂漆園吏東臯去人不遠

武夷先生行狀云仲父牧石翁諱廷聘文名孝譽與先君相
頡頏晚退築幽居吟詠自適詩紹黃初景龍視公安竟陵茂
如也季父子翼翁諱家聘二叔父皆補郡文學

南窗漫記云先徵君受學於伍學父先生先生詩文爲南楚
領袖先徵君與仲父牧石翁杖履周旋時相唱和牧石翁有
詩數百首亂後無一存者憶得三十六灣一首千里平湖水
支分六六灣風橫帆影亂壑斷槳聲聞南北迷鄉望紆迴滯
客顏湘靈愁倚瑟徒倚碧雲閒

述病枕憶得云崇禎甲戌余年十六始從里中知四聲者問
韻已而受教於叔父牧石先生知比耦結構

牧石先生墓表

薑齊文集

云夫之早歲披猖不若庭訓先生時召

置坐隅酌酒勸戒教以遠利蹈義懲傲撝謙撫慰叮嚀至於
泣下道今髮做齒凋忠孝罔據仰負宏慈未嘗不刻骨酸心

深其怨艾而祇畏冰淵差違巨愆則固先生包蒙以養不中之明德所被也

耐國家訓跋

薑齋文集

云以夫之之身沐庭訓者言之或有蕩閑

之過先子不許見不敢以口辨者至兩三句必仲父牧石翁引導長跪庭下牧石翁反復責論述少峯公之遺訓流涕滿面夫之亦閔默泣服而後得蒙溫語相戒

病枕憶得乙亥年有中秋里人張鏗敬和叔父牧石先生一

首

七律

丁丑年有初婚牧石先生示詩有日成博議幾千

行之句敬和一首

七絕

正鈞按病枕憶得丁丑有夏日讀史曳塗居聞松聲懷夏

叔直一詩證以述憶得所云則先生既冠以後固常從學
牧石先生也

石崖先生

王介之字石子一字石崖號耐園又號鏗齋夫之兄也崇禎壬
午同舉於鄉已而流寇陷衡州介之奉父母先避去與弟留城
中倉卒走匿蓮峯下得草舍入伏焉士人先在者數輩介之遽
問黑沙潭去此幾里欲往遊夫之怪之則笑曰今不游何待子
豈能不從我乎俄而奴至言其父爲邏者所得指索二子介之
將出夫之以兄性剛厲慮父子俱殞固止之既免而夫之遂出
仕桂藩崎嶇兵寇中國亡君奔然後歸而介之遯山中獨與妻

子煮脫粟薪栲栳衣草冠四十餘年遭亂播遷不出永邵之境儒生或往往從質經義更以和易爲鄉人所歸自以遺民深匿其迹與夫之異居徒聲相聞而已著有周易本義質春秋四傳質詩序參春秋家說補詩經尊序春秋四傳質見 四庫著錄晚題座右曰到老六經猶未了及歸一點不成灰年八十一

卒

沅湘耆舊集小傳 衡陽縣志

石崖先生傳略

蓋齋文集

云吾先子之得兄也年三十有七惜兄

甚而兄幼端凝淡泊食淡衣麤更以爲適仲兄稍長同席受讀無一非兄曲意怡聲壘壘講說以成之者若夫之狂嫉無度而槩括弛弓閑勒逸馬夏楚無虛旬面命無虛日者又不

待言惻排天極孤高嶽立爲夫之所待函丈而習知者

又云崇禎末人士以聲譽相高嘗愴然謂夫之曰此漢季處士召禍之象也文章道喪不十年而見矣壬午舉於鄉錄文呈御計偕至南昌楚中亂遂同夫之歸是時觀察全椒金公念吾兄弟貧甚欲爲治北裝邑有劣而梟者按法當死公屬意令餉吾兄弟千金活之其人來懇兄顧問夫之曰何如夫之答曰此固不可兄喜見於色曰是吾心也或曰千金不死於市豈能必彼之不幸免乎兄又顧夫之微笑夫之曰吾安能令其必死但不自我可耳兄曰此人逸他日禍延於鄉黨雖然吾謝吾疚而已子言是也遂峻拒之其人他請得釋後

果一如兄言凡兄之所以教夫之而相砥礪者如此類不能
毛舉也

詩傳合參序

薑齋文集

云伯兄石崖先生曰吾以序言詩而於生

平諷誦所蓄疑而未安者自覺爲之豁如覺其豁如者覺也
覺者天理之舍古今之府以效古人而自覺者也乃若愚所
謂眩者則非此之謂也竊二氏之士苴建爲門庭以與朱子
訟戴古本爲冒鑄之盾究亦未知漢儒之奚以云也若此者
固愚兄弟所過門不入而無憾者

耐園家訓跋云吾伯兄律已嚴而慈仁有加於先子夫之嘗
受益焉然夫之自不能言物行恆迪威如之吉又安能不自

疾媿耶

貞獻先生墓志

永興李樸大撰

云所居耐園幽篁荒崖與麀麀接武

鶉衣草食四十餘年人迹殆絕與弟薑齋夫之志道同而更相砥礪所僅與游者涪水劉惟贊同邑李國相兩三人而已

家譜序

先生次子虎止政撰

云歲丙寅伯父石崖公七兄騰原相繼奄

背先子力疾過長樂治喪事歸而爲孤鴻賦爲哀先伯父作也次歲姪祚爲先伯父立祠堂於長樂之石仙嶺先子係之

聯云門外黃鸝嘯碧草他生杜宇喚春歸

按孤鴻賦今存文集自注丙寅爲石

崖先生作

衡陽縣志山水第九云武水自龍眼塘南流逕石師陰東王

介之隱居處也自號石崖蓋以此山今其子孫猶居陰下始
介之與弟夫之匿迹故鄉恆憂併命故各隱巖洞樵蘇自爨
夫之每來視兄輒以夜行門生舁之鄉農皆知是王行人也
敬其貞介無相詰禁

病枕憶得庚辰年有送伯兄入北靡一首

五古

五十自定藁己丑年有自南嶽理殘書西歸慈侍困於土人
殆濱不免太孺人怛慙廢食既脫諭令去此有作聊呈家兄

一首

七絕

庚寅年有石板灘中秋無月奉懷家兄一首

七律

六十自定藁己酉年有因林塘小曲築草菴開南窗不知復
幾年晏坐漫成六首呈桃塢老人暨家兄石崖先生同作

五律

葦齋詩編年彙壬子年有家兄期以中秋過敗葉廬會恙未
果吟詩見懷逾月袖小詩下訪適當閏望是夕人閒謂爲中
秋夜坐不復對月敬和來篇奉酬一首古七 癸丑年有家

兄小築耐園俯用夫之觀生居韻病不能爲偶句放時體覺

前韻奉和六首古五

七十自定彙壬戌年有春初雨歇省家兄長夏庵中惘然有

作六首古五

戊辰年有寄題先兄祠屋二首自注云戊辰五月己卯祔

孫奉主人祠
耐舊耐園也

鼓棹初集有留別家兄南鄉子一首 二集有除夕憶家

兄雙雙燕一首

正鈞按石崖先生卒於康熙丙寅年八十一上朔生年在萬曆丙午蓋長於先生十有三歲武夷先生歸田在辛未先生年已十三觀石崖傳略所云則先生童年入塾固石崖先生授讀也攷石崖先生春秋四傳質自序云余家世葩經先君徒業其於先師所傳亦既別有手疏矣而時取先賢傳注所未及者進余兄弟而提命之余兄弟是以有家說正續之述而於三傳之攷訂者尙未及焉按家說正續之述蓋指先生春秋家說世論二書攷新化鄒漢勛敦菴齋文存與鄧湘皋學博書云春秋家說上有評語玩其語趣似是石崖否則良崖治仲雖爲妥洽於例宜刪詳二

書自序後注著雍涪灘之歲爲康熙七年戊申先生年五

十石崖四傳質成於康熙二十年

自序後注時重光作噩之歲

鄒氏所

見評語其爲石崖先生無疑則弟昆晚歲袖釋家學更相
砥礪貞苦概可想見矣

磴齋先生

王參之朝聘仲子崇禎乙酉選貢先朝聘卒性至孝母病目不
能寐參之跪榻下手承目眇率至夜分又患心疾宛轉撫摩數
年不懈癸未流寇陷衡州參之走匿山中不就僞試僞吏呈不
順者以參之爲首幾不測會賊去乃免歲饑侍親避亂南鄉時
米貴道梗合家數百指日食二薄粥參之持粥泣曰此豈老人

食者勸父飯不許因絕勺水竟日父感之爲一加餐其篤性如

此湖南通志本傳

家世節錄云次仲兄參之宏光選貢未就廷試遇亂以疾先
先君卒

石崖先生傳略云仲兄稍長同席授讀而仲兄病幾瘵兄調
護扶掖齧指以授鍼艾仲兄賴以愈而卒以文章名南楚

正鈞按家譜參之字立三一字叔稽號磴齋乙酉福王監
國南京建號宏光通志言崇禎誤詳病枕憶得壬午有朱
亭晴寒寄文小勇一詩有云睠言思君子欲語衷非一親
老復善病旦夕倚苓朮有兄薑桂性以惡爲讎疾豈盡懷

征人向晚霜風慄此詩蓋北上行次朱亭所寄時石崖先生同行詩中有兄薑桂性二語蓋指磻齋先生又按劉氏繼莊廣陽襍記云參之字立三性至孝壬午將就鄉試以父母春秋高不行癸未流賊陷衡走匿山中不就僞試僞吏呈不順者以參之爲首幾不測會賊去乃免爲文婉折有風度受知於督學芝田周公乙酉恩選未仕卒所記於磻齋先生本末亦詳矣

船山師友記弟一

湘潭羅正鈞纂

王僉事志堅

王志堅字弱生崑山人父臨亨進士杭州府知府志堅舉萬曆三十八年進士授南京兵部主事遷員外郎郎中暇日要同舍郎爲讀史社撰讀史商語遷貴州提學僉事不赴乞養歸天啟二年起督浙江驛傳奔母喪歸崇禎四年復以僉事督湖廣學政禮部推爲學政第一六年卒於官志堅少爲詩文法唐宋名家通籍後卜居吳門古南園杜門卻埽肆志經史讀書先經後史先史後子集其讀經先箋疏而後辨論讀史先證據而後

發明讀子則謂唐宋而後無子當收說家之有裨經史補之讀集則定秦漢以後古文爲五編攷覈唐宋碑志援史傳據禠說以參覈其事之同異文之純駁其於內典亦深辨性相之宗作詩甚富自選止七十餘首弟志長字平仲亦深於經學明史文苑本傳 薑齋公行狀次子虎止敬撰云年十四督學王聞修先生諱志堅拔

入學

正鈞按弱生一字淑士聞修殆亦其別字著有讀史商四六法海諸書行狀云年十四入學以先生己未生推之爲崇禎五年壬申薑齋文集石崖先生傳略云胤於庠者八年按石崖先生以己卯中副榜己卯上溯八年正是壬申

則亦以是年食餼也

水侍御佳允

水佳允字向若甯波人進士官湖廣提學僉事

行狀 湖南通志職官表

行狀云甯波水向若先生佳允崑山王澄川先生永祚皆鑒識首拔

正鈞按行狀未注官職湖南通志職官表作水侂應列王

志堅之後當卽一人

佳侂形之譌允應聲之譌也

攷明通鑑崇禎三年

六月御史水佳允劾兵部尙書梁廷棟廷棟不待旨卽奏辯又蔡鼎孫高陽督師略云中樞挽余留京師辛未春梁以事爲御史水佳允所劾予復至關云云辛未爲崇禎四

年與通鑑小異其督學湖廣當在七年詳下是時應尙官侍御也

王中丞永祚

王永祚字澄川崑山人崇禎中上江防兵備僉事修築堤垸湖不爲患屬吏有以荔枝餽者啟其篋得白金卽擲還仍注下攷

尋督學全楚甄拔號稱得人遷治鄖中丞

蓮峯志 湖南通志名宦傳

南窗漫記云己卯自鄂歸至城陵磯風厲檣折幸得登陸步自磯上走岳陽小憩岳侯祠見王澄川先生諱永祚題祠柱云爲臣死忠爲子死孝大丈夫當如此矣南人歸南北人歸北小朝廷豈求活耶允爲警切矣

蓮峯志沿革門云方廣寺崇禎元年戊辰火已卯督學使遷治鄖中丞崑山王公永祚澄川屬僧凝然性翰

正鈞按行狀王澄川列於水向若之後詳上互詳蓮峯志及漫記澄川督學應以己卯畢事卽遷治鄖中丞以此推之王志堅以崇禎六年癸未沒於任甲戌至丙子是水督學丁丑至己卯是王督學

又按澄川明史未爲立傳攷顧氏炎武聖安本紀甲申六月下被逮鄖撫王永祚於獄南疆繹史炎武本傳有二丁亥初應楊永言之辟與吳其沅歸莊共起兵奉故鄖撫王永祚以從夏允彝於吳中事旣不克永祚行遁去是永祚

官終於鄖撫攷明季南略云左良玉與李自成相拒於朱
仙鎮左兵二十萬鄖撫王永祚在內良玉在外約爲固守
一夕良玉忽携大眾遁去城遂不可守鄖撫微服走爲左
兵所獲遂自投江流二里得漁人救免潛住武昌殺寇紀
略云左良玉自朱仙鎮南潰退屯襄陽十二月賊趨白馬
渡良玉移營扼之賊渡如故良玉拔營南行鄖撫治王永
祚棄城走據此澄川蓋以失地被逮南都陷未竟其獄後
日起兵不克終復隱去也

高提學世泰

高世泰字彙旃無錫人崇禎中督學湖廣究心經史崇尚理學

博徵名儒讀書濂溪書院以名節相砥礪著有三楚文獻錄世
泰少侍從父左都御史攀龍講席晚年以東林先緒爲己任葺
道南麗澤堂於梁溪一時同志恪遵遺規與祁州刁包相聞問
學者有南梁北祁之稱大學士熊賜履講學出世泰門下儀封
張伯行平湖陸隴其亦嘗至東林講學歛人汪學聖者援儒入
禪既至東林乃悟前非徽州汪知默陳二典胡鼎汪佑吳慎朱
宏施瑣輩講朱子之學於紫陽書院因汪學聖以問學東林更
定紫陽通志錄

國史儒林高愈傳
湖南通志名宦傳

南窗漫記云高彙旃先生選士於濂溪書院課習之省試後
慰諸不第者以詩一聯云鳥自嚶喬木魚無羨武昌敦友誼

薄榮名人師之語也

自序

蘊齋逸文

云梁谿高彙旃先生世泰評夫之時藝云忠肝義

膽情見乎詞永歷二年明旨下獎云骨性松堅君師均在於
三而匪我伊蔚實忝所生何以仰酬假借哉苟免污辱良不
足道豈得藉口死爲傷勇耶

蓮峯志沿革門云壬午學使梁溪高公世泰彙旃益命之以
隆武元年乙酉十一月再造又云山豈不以人哉則朱張二
夫子最矣二賢祠者祠兩夫子者也祠與寺廢未興高公世
泰問其址乃立五楹駢立窈然幽邃 又名遊門云近之

遊者有吾師高彙旃先生世泰以崇禎壬午臘月尋訪徹暮

舉野燒數十里燭若白日駭鹿衝筍輿公快叫以爲奇絕

正鈞按周氏聖楷楚寶篇首有梁谿高世泰序云楚幅員
視十二省最賒余以庚辰來視學證之蓮峯志所云則彙
旃督學湖南當是庚辰至壬午三年先生以壬午得舉高
之遊蓮峯在臘月時先生已上計偕病枕憶得壬午有毒
錫山高太夫人七律一首應卽彙旃之母詩有靈苗春長
之語蓋作於是年春間也

又按先生淵源家學其以文受知者行狀所述數公自歐
陽方然外均未嘗著之言論惟彙旃先生逸文自序及蓮
峯志皆稱之爲師南窗漫記係晚年之作猶拳拳追念不

知行狀何以獨遺之攷小腆紀傳彙旃入 本朝隱居不
仕講學東林康熙中葉猶存而與先生音問互絕則以道
遠之故而先生又遁迹深山也

蔡比部鳳

蔡鳳字威函官比部郎中

病枕憶得

籍貫侯攷

病枕憶得壬午年有上蔡威函先生一首

律排

正鈞按題下注云先生諱鳳以比部郎欽恤楚刑徵文課
枉見特獎期於鄂城相待詩以志感詩中有笑語僊舟沿
吹噓錦字頻所期良鄭重自警敢逡巡等句云於鄂城相
待蓋在秋試以前也

歐陽黃門霖

歐陽霖初名介字方然安福人以瀘溪教諭陞北流知縣曹煜
守梧州永歷元年正月李成棟遣副將楊大甫張月自高州進
兵來攻師甫至郊煜出迎降檄所屬守令歸附霖抗節不屈煜
遣兵捕之走南甯得免擢戶科給事中車駕幸肇慶李成棟遣
杜永和來扈蹕蒙正發與廷爭永和怒目視之廷臣遂誅霖上
言成棟輸忠効順所不忍忘者君臣大義耳今永和恣睢闕廷
辱天子諫官君臣之分謂何若貫永和不問則成棟精忠且爲
永和所掩又何以號召天下之忠義哉上釋不問霖乃棄官歸
里閉戶食貧不通人事

永歷實錄劉季
鑣傳曹煜傳

家世節錄云先君家居長吏到門以疾卻刺夫之舉主歐陽方然先生諱霖相過請見者三乃一報謁而止

自序云壬午舉於鄉方上計偕至南昌而李自成陷承德襄荆左良玉奔江黃癸未元日舉主歐陽方然先生介

自注改名霖

論夫之歸養

病枕憶得癸未年有上舉主歐陽公一首

七古

歐陽公招遊龍

沙同劉曲溟周二丕洎齊年諸子寺有湯臨川手題卽用爲起句一首

五律

薑齋詩分體彙甲子年有得安成劉牧功書知舉主黃門歐陽公已盜逝三年矣賦哀四首

七律

正鈞按賦哀詩第一首云死生郴水停驂路自注戊子冬
遇公於興甯遂成永訣又云邂逅章門執雉時自注壬午
臘初謁公於南昌劉都督綬祠第三首有云求砂不屑句
漏井自注公舊宰北流古句漏地種秫難留下撰田自注
公從王嶺外田廬沒入又云醜土虛名留白眼家傳風味
有青瓊自注救功書云公孫穎悟肖公弟四首有云故國
衣冠涕淚殘橋山弓劍不重攀自注公於南甯以內艱辭
闕據此及自序所述師門之誼可以想見興甯爲湖南瀕
廣西邊邑據章靈賦注先生正以戊子冬初次赴闕攷永
厯寶錄桂王紀李成棟遣杜永和迎駕係永厯二年八月

按永曆二年九月上發南甯幸肇慶詩注云於南甯以內艱年爲戊子

辭闕則方然廷爭棄官在戊子季秋道過興甯先生正以冬初赴闕與之相遇也甲子爲康熙二十三年上三年爲辛酉其去辭闕時已三十年永曆實錄應成於康熙癸卯甲辰年間故未言所終而云食貧不通人事則亦相聞問也

郭給諫之祥

郭之祥吉水人崇禎元年進士官檢討

江西通志職官表

行狀云崇禎十五年壬午以春秋魁與伯父石崖先生同登鄉榜大主考爲太史吉水郭公之祥副主考諫議大興孫公

承澤

正鈞按明貢舉考略是年湖廣鄉試但載副考官孫承澤而無正考官郭之祥是科首題請益曰無倦次題義者宜也三題其爲人也好善好善足乎曰好善優於天下

孫侍郎承澤

孫承澤號退谷大興人崇禎辛未進士官刑科都給事中受李自成僞防禦使職入國朝起授吏科都給事官至吏部侍郎著有五經翼春明夢餘錄庚子銷夏記

貳臣傳

正鈞按行狀稱諫議則退谷時以給事典試湖廣也

船山師友記第二

湘潭羅正鈞纂

蔡忠烈道憲

蔡道憲字元白晉江人崇禎十年進士爲長沙推官地多盜察
豪民通盜者把其罪而任之盜方劫富室分財收者已至富家
還所失物皆愕不知所自惡少年閉門謀爲盜啟戶捕卒已至
其門驚逸去吉王府宗人恣爲奸道憲先治而後啟王王召責
之抗聲曰今四海鼎沸寇盜日滋王不愛民一旦挺而走險能
獨與此曹保富貴乎王悟謝遣之十六年五月張獻忠陷武昌
長沙大震承天巡撫王揚基提所部千人自岳州奔長沙道憲

請還駐岳州曰岳與長沙唇齒也并力守岳則長沙可保而衡
永亦無虞揚基曰岳非我屬也道憲曰棄北守南猶不失爲楚
地若南北俱棄所屬地安在揚基語塞乃赴岳州及賊入蒲圻
卽遁去湖廣巡撫王聚奎遠駐袁州憚賊不敢進道憲勸令移
岳聚奎不得已至岳數日卽徙長沙道憲曰賊去岳遣可繕城
以守彼犯岳猶憚長沙若棄岳長沙安能獨全聚奎不從賊果
以八月陷岳州直犯長沙先是巡按御史劉熙祚令道憲募兵
得丁壯五千訓練之皆可用至是親將之與總兵官尹先民等
掘羅塘河聚奎聞賊逼大懼撤兵還城道憲曰去長沙六十里
有險可柵以守毋使賊踰此又不從時知府堵允錫入覲未返

通判周汝南攝攸縣事城中文武無幾賊薄城士民盡竄聚奎
詭出戰遽率所部道道憲獨拒守賊繞城噓曰軍民久知蔡推
官名速降毋自苦道憲令守卒射之斃越三日先民出戰敗還
賊奪門入先民降道憲被執賊啗以官嚼啗大罵釋其縛延之
上坐罵如故賊曰汝不降將盡殺百姓道憲大哭曰願速殺我
毋害我民賊知終不可奪磔之其心血直濺賊面健卒凌國俊
九人隨不去賊亦令說道憲降國俊曰吾主畏死去矣不至今
日賊并殺之一卒奮然曰願瘞主屍而死賊許之乃解衣裹道
憲骸瘞之南郊醴陵坡遂自刎道憲死時年二十九贈太僕少

卿諡忠烈

明史本傳

行狀云華亭章公諱曠江門蔡公諱道憲是時俱爲分攷國勢漸不可支出場後引爲知己互相砥礪

薑齋詩分體橐乙卯年有拜蔡公祠堂一首

五古

正鈞按忠烈爲分攷在崇禎壬午先生是年得舉出安福歐陽方然門忠烈殉節卽在次年中間殆未相聞問忠烈祠堂已建於明季

詳堵允錫蔡公祠田記

乙卯爲康熙十四年自定橐乙卯有長沙旅興四首先生是年避吳逆之亂出居於外因過長沙謁其祠也

章文毅曠

章曠字于野別號峩山直隸華亭人崇禎丁丑進士授沔陽知

州十六年春李自成陷承天州人全起迎賊曠號召忠勇城守以奇計縛首逆賊者數十人磔之賊掠騎至曠乘城擊卻之賊益來攻民盡驚潰嚮迎賊者黨將應賊縛曠降曠乃攜印出走詣北撫王揚基請兵復沔不聽乃歸華亭鬻田宅得數千金走漢沔間收兵十七年春復沔陽州何騰蛟上其功擢僉事巡飭江北京山楊文薦爲兵部郎倡言江北不宜置道徒擾民無益恢復廷議從之曠由是失職騰蛟獨深知之復以監軍道請於朝命已下路振飛舊按江南怒曠不納門生刺力沮監軍之命騰蛟抗疏言臣受土崩蟲齧之殘楚孤掌獨撐無一人之可用唯得一章曠者爲有生人之氣屢題而部屢隄之是縛臣臂而

欲使臣鬥也乃得仍授僉事監騰蛟軍檄攝分巡上湖南道曠
至衡州開東鹽輸長沙歲餉兵十萬金騰蛟賴以不匱已歸長
沙請身下岳州監馬進忠王允成軍以死護湖外單舸下洞庭
進忠允成迎之願受節制先是騰蛟開府長沙堵允錫旣解學
政勤王與諸軍帥相馴習傅上瑞久攝巡下湖南承權藉亦與
諸帥周旋稍熟而曠屢革削望尤輕諸軍帥皆不知有曠曠亦
不得其要領及是受監軍之命從胥隸數十人輕舸東下敝衣
葛衫與諸將乍相見流涕握手推心盡慮與謀興復諸將皆爲
感動曠旣得諸將心申約束斬筭如法遂修湘陰城陸立大荆
新牆二戍水立磊石營與岳□相持大小數十戰騰蛟畫守長

沙尤藉曠爲外蔽乃列曠功推薦之詔擢僉都御史巡撫江北
守新疇與敵壘相對湖南北守經年不陷者皆曠力也上卽位
加兵部侍郎餘如故永曆元年春長沙兵將交訐掠奪四出糧
道阻絕孔有德兵至曠率滿大壯孤軍禦戰不勝退長沙騰蛟
已先奔曠殿潰卒轉戰三百里及南嶽市滿大壯戰死曠入衡
州執騰蛟手泣曰長沙不潰曠猶得嬰城死戰今湖南瓦裂何
以謝百姓兩年來剝髓供輸也四月騰蛟走永州曠守祁陽檄
召潰兵圖下爭衡州乃奉勅拜曠武英殿大學士兵部尙書督
恢復諸軍而諸軍爭潰不可合矣時上在武岡劉承允過援兵
不出曠知事不可爲慷慨悲憤不粒食薨年三十有六永曆二

年贈太子太保華亭伯諡文毅

永歷寶錄本傳

先生家傳

潘宗洛撰

云明藩稱隆武年號者使其督師何騰蛟屯

湖南制相堵允錫屯湖北楚省兵燹塞野加以大旱赤地千里而逆闖李自成既斃於九宮山餘黨降者號爲忠貞營蹂躪潘漢有岌業之勢堵何兩公措置無術又不相能先生憂其將敗亟走湘陰上書於司馬章曠指畫兵食請調和南北以防潰變章司馬報曰本無異同不必過慮先生默而退卒之賊勢披猖司馬以憂憤卒堵何二公觀閔凶而勢不可爲矣

三湘從事紀

蒙正發撰

云總督駐東安數月湖南節義之士莫不

聞聲景從衡陽舉人王夫之介之鄒統魯夏汝弼李跨鰲管
治裘吳汝澗周士儀甯鄉舉人陶汝龜湘鄉舉人劉相賢雖
匿影山谷或密報情形請商方略或悲歌唱和緘寄詩篇

樞賢當
作象賢

病枕憶得丙戌年有盛夏奉寄章莪山先生湘陰軍中一首

律七

蠶齋詩編年彙乙卯年有夜泊湘陰追哭大學士華亭章文

毅公一首

律七

蠶齋分體詩彙辛酉年廣哀詩第三有大學士章公曠一首

自注字于野號峩山華亭人謚
文毅丁亥死於永州五古

船山師友記卷二

正鈞按文毅壬午蓋以沔陽知州爲分攷曾於先生有引

爲知己之語

詳上蔡忠烈傳後

潘傳云勸其調和南北以防潰變

攷永歷實錄及各書其後何堵兩公不相協應潰敗悉如
先生所言則先生此出關繫既重而所望於文毅者亦深
矣其至湘陰據憶得一詩爲丙戌盛夏按文毅本傳是時
正受唐藩之命以僉都御史巡撫江北故詩中有閩海絲
綸之語據此則潘傳稱司馬小誤康熙乙卯先生避吳逆之難嘗同蒙
聖功至江西萍鄉六十自定彙乙卯有萍鄉中秋同蒙聖功對月七律一首因道湘陰
弔其遺壘也

李大令興瑋

李興瑋字天玉湖廣巴陵人弱冠以文藻清拔推重流輩應己卯鄉舉爲章曠所賞拔用副榜生貢入太學假歸值張獻忠陷岳州興瑋走江北請兵恢復遇左良玉前部李成名因邀與同復岳州已而獻忠來爭成名兵退興瑋僅以身免賊擒興瑋父母宗族凡二十餘人皆殺之宏光元年李自成渡江興瑋走湖南依章曠參幕府曠請於何騰蛟檄補臨武教諭臨武令貪恠興瑋言於騰蛟罷令去士民戴興瑋攝令事興瑋不從應鄉試於衡州中丙戌鄉舉騰蛟遂題授臨武知縣以簡澹爲邑民愛戴永歷元年四月衡州陷章曠退屯永州召興瑋棄城從已軍中辭曰興瑋不欲受民社而先生強我旣膺百里之命則早盟

之五內期以頸血濺城頭土耳其不能應先生教也督士民城守
時湖南北州縣望風靡走無一守者唯臨武不下距戰凡五晝
夜兵潰被執誘之降興瑋大罵繫之獄唯一髻蒼頭相隨亦不
肯鬚髮請同繫興瑋於獄與聞大成唱和作詩數十篇將赴刑
南向叩首已顧大成曰吾與君今日乃得畢此一大事遂遇害
蒼頭奪刀斫殺興瑋者遂亦見殺

永曆實錄本傳

南窗漫記云河山無地求弓劍臣子何心飽稻菰滅絕耳根
猶有恨破除心事倍多情章文毅公守湘陰時作見之巴陵
李天玉興瑋扇頭天玉公門人攝臨武令城陷死之

病枕憶得丙戌年有送李天玉以廣文行邑令之臨武一首

五律

正鈞按先生丙戌走湘陰上書章文毅是時天玉應尙在幕府據憶得寄章峩山詩詳題云盛夏於握扇之候正合送之臨武一詩當卽作於是時也

鄭中丞古愛

鄭古愛字子遺湖廣江夏人壬午鄉試出章曠門亟薦不得中已召與見姿抱豪邁爲曠所器重曠失沔陽古愛迎謁於江漢與收兵江北武昌陷奔長沙曠方受監軍命古愛以貢資版授監紀推官堵允錫檄監王楊馬牛四將兵永曆元年擢監察御史監軍如故常德陷走匿苗峒已聞允錫馬進忠所在赴之遂

同進忠復常德與□兵戰於麻河古愛執矛躍馬首犯敵營大破之古愛家居與左良玉部將馬蛟麟善至是蛟麟降守辰州進忠與古愛謀招蛟麟遣使密達蛟麟所蛟麟問鄭秀才何亦至此使者以方爲御史監軍對蛟麟大喜曰吾當爲此秀才效死力汝歸告馬將軍鄭秀才期以十一月下武陵合營明春取武昌若吾至而鄭秀才不在是給我也使者歸報進忠喜遂儲芻糧以俟允錫入巴巫調忠貞營強古愛俱去蛟麟不果降忠貞營至進忠驚走古愛追及之湘鄉相持泣下遂入見擢僉都御史永曆四年楚事益壞乃遣古愛圖辰常招蛟麟古愛入對曰蛟麟雖於臣有香火緣然去遠之際自不能不以勝敗移心

今楚兵連敗臣卽劊心於蛟麟前亦一團肉耳請血戰以前而後臣可以用其招致不然徒令蛟麟笑臣無益上固遣之領勅至平樂又以議招不如議戰請不報古愛憂患成疾卒永愍實錄本傳

南窗漫記云庚寅秋與鄭子遺中丞遇於韶州子遺問黃鶴樓柱帖誰佳余未有以對子遺云禰衡洲上千年恨崔顥樓頭一首詩豈非獨步

正鈞按先生壬午得舉於章文毅有知己之言子遺是科文爲文毅所賞想其時已與先生相識故道途話舊而以昔日所遊名勝相問也

堵太傅允錫

堵允錫字仲緘別號牧遊直隸宜興人中崇禎癸酉鄉舉以父
母早世貧不能具禮辭計偕追廬墓三載墓柯方冬生華黃道
周著禮問一篇旌其志丁丑乃就公車賜進士授兵部主事晉
員外郎遷長沙知府與推官蔡道憲以志義廉隅相獎勉十六
年張獻忠陷長沙允錫上計未返以課最擢分巡武漢道參議
宏光元年改提督湖廣學政左良玉舉兵下九江允錫方校士
湖南故不遇與何騰蛟奔長沙間南都陷乃集允錫及傅上瑞
章曠議戰守允錫至性深摯北都之變號泣絕食者數日及是
慷慨誓死以濟國難聞者咸爲感躍然負氣矯迫喜興作無持
重之度騰蛟題薦允錫巡撫湖南與分汛任戰守允錫爲高李

部奏請立忠貞營易高得功名必正李過名曰赤心皆奏準以
欽賜行隆武元年卒忠貞營圍荊州大敗還屯常德忠貞營奔
巴蜀不相聽命允錫節鉞自騰蛟奏薦而據舊章刺以平交相
往復騰蛟不悅兩府幕賓益相構煽遂成猜離湖南北不相協
應上嗣位加允錫兵部侍郎總制楚撫未幾晉尙書拜武英殿
大學士封光化伯允錫辭伯不受及長沙陷騰蛟奔衡永馬進
忠走湖北允錫走屯永定衛山中已進忠兵復常德允錫欲因
其兵出復長沙進忠方與鄭古愛招馬蛟麟於辰州不卽聽允
錫允錫自與古愛招忠貞營下長沙以下荊州爲名至常德百
里乃以書報進忠言會師攻長沙進忠大驚疑卽并已拔營南

走忠貞營至常德已赤地卽尾進忠後自甯鄉趨湘潭湖北復陷騰蛟汎輕舸至湘潭乃與允錫議以南昌求援甚急允錫督忠貞營往援而忠貞營徘徊茶攸閒無行意騰蛟敗沒忠貞營走衡州爲入粵計允錫不能令也胡一青迎允錫居衡州未數日孤軍戰不勝允錫倉猝渡湘東走耒陽與忠貞營會自懷集走梧州忠貞營先自梧入潯勅遣大學士嚴起恆慰勞安插之與允錫遇乃入覲上命督忠貞營出楚賜龍旗十二徧調天下兵馬咸受節制允錫至潯州日促忠貞營復出會李赤心死高必正以新喪大帥爲辭允錫居悒悒有頃朱天麟陳邦傅言忠貞營不可恃無如可望之足有爲允錫感其說發龍旗一往雲

南調可望胡執恭因誅允錫言能承制姑許可望封王事必集矣因填空頭勅許可望執恭遂僞作冊寶以往既行乃告允錫允錫悔爲所賣恚恨成疾以永歷三年十一月卒於潯州詔贈

太傅

永歷實錄本傳

蓮峯志沿革門云以隆武元年乙酉十一月十二日再造與其役者楚撫義興堵公允錫仲緘衡陽王介之石子管嗣裘治仲夏汝弼叔直王夫之而農也 又名遊門云近之遊

者今楚撫堵公允錫以宏光乙酉暮春踏新雨問余兄弟匿蹟處訪續夢菴欣然將登之下嶽舉詩索和

南窗漫記云堵牧游先生遊南嶽問余兄弟避寇處於方廣

道中有句云雙溪濺水鳴絲竹一壁初晴負畫圖 又云

牧遊先生於德慶軍中授余軍謠十首令傳之其題則月家鄉馬兒女雨漿洗風晒涼筆先鋒口打仗報瘡疾基金丹血筵席營十殿備喪亂艱危之狀天下之不支公心之徒苦俱於此乎傳之流離中遽失其稟

三湘從事紀序

蘆齋逸文

云常平心論之義興自是忠孝人但曾

侍其弈不勝則掇十數子而易之對弈者不敢爭當時剩水殘山幾十數子乎近有著書者言義興在潯南時將捲土重來爲聖功諸公所阻余亦忝爲義興知遇皇天后土實式憑之義興至潯南又爲崑山朱震所怵忠孝之氣鬱不得伸邑

邑而咨余不敢昧也

船山經義樂正子春下堂至于是以有憂色也文後注云堵
牧游先生貽夫之以黃石齋先生禮問石刻首舉下堂傷足
一案深切詳委兵火中失去三十餘年未知人間猶有此文
字否

病枕憶得乙酉年有堵牧游先生登嶽拜二賢祠於方廣垂
問余兄弟避賊處將往尋訪以道險止行至郡以新詩見示
感賦一首

七律

堵公以黃石齋先生禮問石刻垂贈紀公補廬

先墓事有桐華之應詩以紀之一首

五律

五十自定彙庚寅年有康州謠追哭義興相公是去秋同鄒

管一中舍會公地一首五律

丙寅年有二賢祠重讀義興

相公詩感賦一首五律

五律

正鈞按本傳題授撫臣在南都既陷以後蓮峯志云堵游以暮春則是時尙以湖廣學政校士來衡與先生相見攷逸文乞終喪疏云與中書舍人管嗣裘起義事敗逃死行闕前督輔臣堵允錫誤以庶常薦臣又行狀有云已而堵公辟檄兩及府君臥耒陽不行按行狀承上丙戌走湘陰上書而言次年丁亥先生寓居湘鄉詳下弟七卷未嘗身至耒陽明年以兵敗走行闕章靈賦注云舉兵不利遂由郴桂入粵戊子冬至行闕爾時堵公方以武英殿大學士督師常德蓋始以徵辟不至繼

聞先生赴闕復遙相題薦皆戊子年事乞終喪疏爲辭瞿
式耜之薦上於永曆三年己丑十二月堵公以十一月沒
故稱前督輔臣康州卽德慶舊名永曆實錄桂王紀三年
六月命堵允錫督楚師遂次於潯州是年夏先生復由閩
道赴闕

章靈賦注云己丑夏復由閩道赴闕

故以秋閒過其軍中也

晏尙書清

晏清字元洲湖廣黃岡人萬曆己未進士授吳江知縣擢吏部
驗封司主事天啟間忤魏忠賢削籍歸里崇禎初徵旨屢下乃
起歷驗封司郎中用年例遷廣東鹽法道僉事宏光元年擢清
尙寶司卿隆武二年再遷太僕寺卿皆不赴上在南甯擢吏部

三
尙書敦趨入陛見專理銓政清澹簡易門無私謁行在翕然推
重吳貞毓以主事躡吏部侍郎趨權利深忌清而無能與競時
江楚避難出者爭稱起義求進朝廷無能辨清爲分別用舍羣
不逞者造蜚語以搖動清永歷四年吳貞毓爲戶部尙書與王
化澄相表裏逼清清屢乞骸骨疏上未許會詔獄起清諫不聽
遂移疾不起拜疏卽行居潯州未幾卒年七十有三子霽明永

實錄本傳

乞終喪疏

真齋逸文

云前督輔臣堵允錫誤以庶常薦臣臣告之

冢臣晏清幸得以終制覆允

正鈞按堵允錫之薦先生在戊子詳永歷實錄桂王以丙

戊十月監國肇慶改明年爲永曆元年則戊子爲二年桂
王紀云二年七月以晏清爲吏部尙書故疏稱清爲冢臣
據此則先生以是年兵敗走行闕首膺堵允錫之薦得緣
晏清入告乃以終制覆允疏中敘述甚明虎止行狀云膺
難西走後卽敘大學士瞿式耜薦之蓋未詳也

霽明字雲章少以文名於楚與麻城曹允昌相頡頏尤工爲詩
清茂有遠致兩赴鄉舉未第隨父宦嶺外永曆二年授太常寺
博士四年進儀制司郎中安雅遠權勢傲菴居閉戶讀書非朝
參不出扈蹕至梧州病卒

晏清傳

南窗漫記云黃岡晏雲章奉常霽明作排律二十韻以內閣

芭蕉爲題余和之今皆亡矣唯記晏作一聯云天清垂湛露
海氣避嚴霜余亦有句云甘露憂多變綠雲望已長

正鈞按漫記一條承上端州行宮而言端州卽肇慶舊名
五十自定彙己丑有晨發端州與同鄉人別一詩蓋先生
以戊子冬月始至肇慶己丑正月復返衡陽其時得緣元
洲辭堵薦與雲章相見芭蕉詩當卽和於是時也